

## CONVENIO DE COLABORACIÓN ENTRE A DEPUTACIÓN DE PONTEVEDRA E A REAL ACADEMIA GALEGA DE CIENCIAS

### III CICLO DE CONFERENCIAS AIDA FERNÁNDEZ RÍOS

EXPEDIENTE: 2022017017

## CONVENIO DE COLABORACIÓN ENTRE A DEPUTACIÓN DE PONTEVEDRA E A REAL ACADEMIA GALEGA DE CIENCIAS PARA A REALIZACIÓN DA III EDICIÓN DO CICLO DE CONFERENCIAS AIDA FERNÁNDEZ RÍOS PARA O ANO 2022

Pontevedra, 5 de abril de 2022

### REÚNENSE

Dunha parte, M.<sup>a</sup> del Carmen Silva Rego, presidenta da institución provincial, entidade con CIF P-36 000 00-H, de conformidade coas competencias establecidas no artigo 34.1 da Lei 7/1985, de 2 de abril, reguladora das bases do réxime local (LRBRL), e no artigo 105 da Lei 5/1997, de 22 de xullo, de Administración local de Galicia (LALG).

Da outra, Juan Manuel Lema Rodicio, presidente da Real Academia Galega de Ciencias (RAGC), entidade con CIF Q-156 80 10-A, de conformidade coas competencias establecidas no artigo 33.2 a) dos seus estatutos, aprobados polo Consello da Xunta de Galicia o 11 de abril de 2019 (Resolución da Secretaría Xeral Técnica da Consellería de Economía, Emprego e Industria, pola que se lle dá publicidade ao Acordo do Consello da Xunta de Galicia polo que se modifican os Estatutos da Real Academia Galega de Ciencias, publicado no *Diario Oficial de Galicia*, DOG núm. 86, de 7 de maio de 2019).

Dando fe do acto, a persoa que ostenta a titularidade da Secretaria no momento da sinatura electrónica

Ambas as partes recoñécense con capacidade para formalizar este convenio con base nos principios de colaboración, cooperación, coordinación e eficacia que deben presidir as actuacións do sector público, administracións, corporacións de dereito público e, en xeral, de calquera entidade pública. Tendo en conta o anterior,

### EXPOÑEN QUE

- I. A Deputación de Pontevedra é unha Administración pública, con personalidade xurídica propia e plena capacidade de obrar para o cumprimento dos seus fins propios e específicos, de acordo co disposto no artigo 5 da LRBRL e no artigo 101 da LALG.

- II. A RAGC é unha corporación científica de dereito público, sen ánimo de lucro, dotada de personalidade xurídica e capacidade de obrar.
- III. De acordo co establecido no artigo 6 dos seus estatutos, entre os seus fins están “fomentar a investigación, o estudo e a divulgación das ciencias e das súas aplicacións e a incorporación do coñecemento científico á sociedade, como coadxuvante do desenvolvemento socioeconómico”.
- IV. No artigo 36.1.d da LRBRL atribúenselles ás deputacións a competencia da cooperación no fomento do desenvolvemento económico e social e na planificación no territorio provincial, de acordo coas competencias das demais administracións públicas neste ámbito. Ademais, no artigo 109 da LALG encoméndaselles, en xeral, o fomento e a administración dos intereses particulares da provincia.
- V. No artigo 2 da Lei 13/2008, de 3 de decembro, de servizos sociais de Galicia, defínense os servizos sociais como un conxunto coordinado de prestacións, programas e equipamentos destinados a garantir a igualdade de oportunidades no acceso á calidade de vida e á participación social de toda a poboación galega, mediante intervencións que permitan lograr os obxectivos marcados nesta lei.
- VI. Ambas as partes consideran de interese común promover a cooperación e a colaboración para realizar o III Ciclo de Conferencias Aida Fernández Ríos para o ano 2022.

A RAGC leva organizando actividades, cursos e ciclos de conferencias en toda a comunidade galega desde a súa fundación no ano 1977 e, en liña cos seus obxectivos (difundir a ciencia e a tecnoloxía), pretende levar a cabo por terceiro ano consecutivo este ciclo de conferencias para espertar o interese do gran público en temas de actualidade científica con repercusións sobre a sociedade e contribuír á súa educación e formación en igualdade.

- VI. Os convenios entre as administracións públicas ou coas corporacións de dereito público constitúen o instrumento adecuado para desenvolver a súa cooperación en cuestións de interese común, tal como se establece no artigo 47 e nos seguintes da Lei 40/2015, de 1 de outubro, de réxime xurídico do sector público (LRXSP), no artigo 57 da LRBRL e nos artigos 198 e seguintes da LALG.

- VIII. De acordo cos motivos expostos, é desexo de ambas as partes asinar este convenio, que establece o marco xeral e as bases de colaboración e que fixa as obrigas materiais e económicas concretas de cada unha, polo que manifestan a vontade común de subscribilo de acordo coas seguintes

## CLÁUSULAS

### Primeira. Obxecto

O obxecto deste convenio é establecer as condicións de colaboración entre a Deputación de Pontevedra e a RAGC para a realización do III Ciclo de Conferencias Aida Fernández Ríos para o ano 2022.

Impartiranse un total de 11 conferencias (con 13 persoas relatoras), seis en formato webinario (unha delas tamén presencial), mediante *streaming* e dirixidas á cidadanía en xeral, e cinco presenciais en centros educativos da provincia de Pontevedra, coas características e cos contidos que se detallan a continuación.

Non obstante, as datas de realización e mais o seu formato poderán sufrir cambios segundo a normativa sanitaria en vigor en cada momento e a evolución da pandemia orixinada pola COVID-19. Polo tanto, por razóns debidamente xustificadas, a Deputación de Pontevedra e a RAGC poderán propoñer cambios, tanto nas persoas relatoras propostas coma nas temáticas e nas datas recollidas neste convenio, en función das circunstancias sinaladas e da dispoñibilidade das persoas que as van impartir; neste último caso sempre que se lle comunique previamente ao servizo xestor cunha antelación mínima de dez (10) días hábiles.

### BLOQUE I: SESIÓNS EN FORMATO WEBINARIO OU SEMIPRESENCIAL

- Dirixidas á cidadanía en xeral
- Lugares e datas de realización: de abril a xullo de 2022, seis (6) en formato webinario das cales unha (1) será tamén semipresencial no espazo que determine a Deputación de Pontevedra
- Previsión do número de persoas participantes por conferencia: entre 50 e 100



▪ **TEMÁTICAS**

**1.1. ENFERMIDADES NEURODEGENERATIVAS E ENVELLECIMIENTO**

**Sesión semipresencial e webinar no salón de plenos da Deputación de Pontevedra**

**1.1.1. Título: “A enfermidade de alzhéimer, estamos preto de tratar esta enfermidade?”**

Relator: Carlos Spuch Calva

Investigador sénior do Grupo de Neurociencia Traslacional do Instituto de Investigación Sanitaria Galicia Sur e investigador do Centro de Investigación Biomédica en Rede de Saúde Mental (CIBERSAM).

**1.1.2. Título: “Biomarcadores para a identificación precoz da fragilidade asociada ao envellecemento”**

Relatora: Vanessa Valdiglesias García

Investigadora distinguida do Programa Beatriz Galindo, Centro de Investigacións Científicas Avanzadas, Facultade de Ciencias, Universidade da Coruña.

**1.2. TECNOLOXÍA FARMACÉUTICA AO SERVIZO DA MEDICINA**

**Título: “A tecnoloxía farmacéutica na era da medicina personalizada”**

Relatora: Carmen Álvarez Lorenzo

Catedrática de Tecnoloxía Farmacéutica, Facultade de Farmacia, Universidade de Santiago de Compostela. Académica Numeraria electa da RAGC

**1.3. CIDADANÍA E CAMBIO CLIMÁTICO**

**Título: “A cidadanía ante o cambio climático: aspectos socioeconómicos”**

Relatora: María Loureiro García



Catedrática de Economía Aplicada, Facultade de Ciencias Económicas e Empresariais, Universidade de Santiago de Compostela. Académica Numeraria electa da RAGC

#### **1.4. SISMOS EN GALICIA**

**Título: “ Os movementos sísmicos en Galicia: por que se producen e cal é o maior perigo que podemos agardar deles”**

Relator: Juan Ramón Vidal Romaní

Catedrático emérito da Área de Xeodinámica Externa, Universidade da Coruña. Académico Numerario da RAGC

#### **1.5. APLICACIÓNS DA INTELIXENCIA ARTIFICIAL**

##### **1.5.1. Título: “Intelixencia artificial e imaxe médica”**

Relatora: María José Carreira Nouche

Profesora titular da Área de Ciencias da Computación e Intelixencia Artificial, Centro Singular de Investigación en Tecnoloxías Intelixentes (CITIUS), Universidade de Santiago de Compostela.

##### **1.5.2. Título: “Os sistemas recomendadores, combatendo a saturación da información”**

Relator: José Pazos Arias

Catedrático no Departamento de Enxeñería Telemática, Departamento de Enxeñería de Sistemas Telemáticos, Universidade de Vigo. Académico Numerario da RAGC

#### **1.6. TECNOLOXÍA DE BIORRECURSOS VEXETAIS**

**Título: “Antioxidantes naturais: obtención e aplicacións tecnolóxicas”**

Relatora: Herminia Domínguez González



Catedrática de Enxeñaría Química, Facultade de Ciencias, Campus de Ourense, Universidade de Vigo. Académica Numeraria da RAGC

## **BLOQUE II: CENTROS DE ENSINO (cinco conferencias)**

- Dirixidas ao alumnado dos centros de ensino da provincia de Pontevedra (ESO, bacharelato, ciclos) propostos pola Deputación de Pontevedra.

- Datas de realización: de setembro a decembro de 2022.

- Presenciais, se ben poderán adaptarse en función da normativa sanitaria vixente nese momento e da dispoñibilidade das e dos relatores.

### ▪ **TEMÁTICAS**

#### **2.1. Título: "Testemuñas silenciosas: o que o ADN nos conta dun feito criminal"**

Relatora: María Victoria Lareu Huidobro

Catedrática de Medicina Legal e Forense, directora do Instituto de Ciencias Forenses, Universidade de Santiago de Compostela.

#### **2.2. Título: "Tris-tras, coas matemáticas o terás"**

Relatora: María Victoria Otero Espinar

Catedrática de Análise Matemática, Universidade de Santiago de Compostela, vicepresidenta da Real Sociedade Matemática Española.

#### **2.3. Título: "Auga residual: de residuo a recurso"**

Relatora: María Teresa Moreira Vilar

Catedrática de Enxeñaría Química, Centro de Investigación Interdisciplinar en Tecnoloxías Ambientais (CRETUS), Universidade Santiago de Compostela.



#### **2.4. Título: "Ciberseguridade: que son os piratas informáticos e por que precisamos deles"**

Relator: Manuel Caeiro Rodríguez

Profesor contratado doutor en Enxeñaría Telemática, Escola de Enxeñaría de Telecomunicación, Universidade de Vigo

#### **2.5. Título: " Microalgas: microbios que fan funcionar o planeta en segredo"**

Relatora: M.<sup>a</sup> Ángeles Cid Blanco

Catedrática de Microbioloxía, Centro de Investigacións Científicas Avanzadas, Facultade de Ciencias, Universidade da Coruña

### **Segunda. Orzamento**

O custo da execución das actuacións previstas neste convenio é de doce mil (12.000,00) euros, con cargo á aplicación orzamentaria 22/231.2313.480.02 do Servizo de Cohesión Social e Xuventude.

Estas actividades terán lugar entre os meses de abril e decembro de 2022.

### **Terceira. Obrigas da Real Academia Galega de Ciencias**

1. Asumir a organización e a coordinación de todas as conferencias en coordinación coa Deputación de Pontevedra.
2. Colaborar na difusión da realización deste ciclo e de cada unha das conferencias que o integran.
3. Facer visible na publicidade do evento e en todo o material que se empregue para a súa difusión e impartición a financiación deste pola Deputación de Pontevedra.
4. Xustificar as actuacións executadas perante o órgano provincial no prazo máximo de tres (3) meses desde a finalización das actividades mediante a presentación das correspondentes facturas ou documentos análogos acreditativos do gasto efectuado.

Para a correcta xustificación deberase achegar, xunto co anterior, a seguinte documentación:

- Memoria debidamente asinada da actividade que se realizou e dos resultados obtidos
- Conta xustificativa coa relación dos gastos
- Declaración responsable de que os gastos e os ingresos que figuran na conta xustificativa se destinaron á actividade obxecto do convenio
- Declaración responsable de que os ingresos e as subvencións ou axudas obtidas, se as houbera, non superan o custo da actuación
- Calquera outra documentación esixible pola normativa vixente para a correcta xustificación deste convenio ou que se considere necesaria para comprobar a correcta execución do obxecto do convenio

5. A RAGC debe utilizar, con carácter xeral, formas de pagamento a terceiras persoas que se poidan acreditar mediante un documento expedido por unha entidade financeira, no que se identifiquen a entidade beneficiaria, o importe e a data de pagamento (cartóns bancarios de crédito ou débito, talóns nominativos, transferencias bancarias etc.).

Excepcionalmente, e por razóns debidamente motivadas expostas á Deputación de Pontevedra, poderase usar o pagamento en metálico cando non sexa posible outra forma de pago. O incumprimento desta disposición poderase considerar causa de resolución.

Así mesmo, o pagamento de todas as facturas que figuren na conta xustificativa deberá efectuarse no prazo máximo dun (1) mes desde a percepción dos fondos e realizarse preferentemente a través de entidades financeiras; será obrigatorio, en todo caso, cando o importe de cada factura supere os novecentos (900,00) euros . No caso de non ter contabilidade fiable, soamente serán subvencionables os gastos que se poidan acreditar mediante extractos bancarios (independentemente do seu importe).

Tamén cómpre sinalar que a porcentaxe de desviación máxima dos diferentes conceptos da actividade subvencionada respecto do orzamento inicial non superará o 30 %.



A institución provincial poderá realizar as inspeccións e as comprobacións que considere necesarias co fin de asegurar o cumprimento das normas e do obxecto do convenio de colaboración.

En todo caso, as facturas ou documentos análogos acreditativos do gasto e o resto da documentación xustificativa serán verificados polos servizos técnicos provinciais e fiscalizados por Intervención antes de seren aprobados.

6. A Academia quedará obrigada a prestar a colaboración e a facilitar tanta documentación lle sexa requirida no exercicio das funcións de control que lles corresponden á Intervención, ao Consello de Contas e ao Tribunal de Contas; así mesmo, someterase ás actuacións de supervisión e control previstas na Lei 9/2007, de 13 de xuño, de subvencións de Galicia, e ás demais derivadas da normativa de axudas e subvencións.

#### **Cuarta. Obrigas da Deputación de Pontevedra**

1. . Financiar a actividade obxecto deste convenio coa cantidade máxima de doce mil (12.000) euros, en concepto de colaboración coas execucións anteriormente sinaladas.
2. Deseñar a imaxe do III Ciclo de Conferencias Aida Fernández Ríos e elaborar o material de difusión deste en coordinación coa RAGC.
3. Poñer a disposición os medios para a retransmisión da conferencia realizada de xeito semipresencial.
4. Darlle repercusión á programación do III Ciclo de Conferencias Aida Fernández Ríos para o ano 2022 e difundila nos perfís sociais do organismo provincial.

#### **Quinta. Compatibilidade con outras subvencións**

As achegas económicas previstas no convenio serán compatibles con outros ingresos ou recursos para a mesma finalidade procedentes de calquera Administración ou ente público ou privado, nacional, da Unión Europea ou de calquera organismo internacional. O importe destas achegas en ningún caso poderá ser de tal contía que, illadamente ou en concorrencia con outras axudas, ingresos ou recursos, supere o custo da actuación obxecto deste Convenio.



### **Sexta. Comisión de seguimento**

Para o seguimento e o control do cumprimento deste convenio e tamén para aclarar as dúbidas que suscite a súa interpretación, constitúese unha comisión de seguimento da que forma parte unha persoa representante designada por cada unha das partes, que poderá contar coa asistencia do persoal técnico de cada parte que considere conveniente.

As súas funcións, entre outras, serán as seguintes:

- Impulsar e avaliar o cumprimento deste convenio proponendo as actuacións que se consideren precisas.
- Proponer, en caso de dúbida, a interpretación do seu contido.
- Proponerlles ás partes a súa resolución na aplicación do convenio no caso de xurdiren controversias.

Esta comisión reunirse dentro do prazo de tres (3) días contados desde a petición expresa realizada por calquera das partes.

### **Sétima. Relacións laborais**

Os acordos que se reflicten neste convenio e os específicos que, no seu caso, se asinen terán carácter administrativo e deles non se derivarán, en ningún caso, dereitos ou obrigas de carácter laboral.

### **Oitava. Difusión da colaboración**

A RAGC comprométese a realizar a difusión da colaboración da Deputación e a destacar en lugares ben visibles mediante carteis, *rollers*, folletos, carpetas, actividades, publicacións e comunicacións en prensa, radio, televisión, internet, vídeos ou videoconferencias, entre outros.



De acordo co establecido na Resolución presidencial de 3 de maio de 2017 (núm. de rexistro 2017008767) en relación coa remisión ao Tribunal de Contas dos convenios que se formalicen coa Deputación e cos seus organismos dependentes, no artigo 53 da LRXSP e na normativa de desenvolvemento (Instrución do Tribunal de Contas, Resolución, de 2 de decembro de 2016), as entidades locais deben remitir anualmente, e por procedemento telemático, unha relación certificada comprensiva dos convenios formalizados pola entidade local (e as súas entidades dependentes) no exercicio anterior, independentemente do seu importe e antes de que conclúa o mes de febreiro do exercicio seguinte ao que se refira.

Ademais, deberán comunicarse as incidencias que sucedan durante a súa execución (modificacións, prórrogas ou variacións de prazos etc.) no prazo de tres (3) meses desde a data na que se produzan.

Para tales efectos, co obxectivo de contribuír aos principios de publicidade e transparencia, este convenio publicarase nas páxinas web das entidades asinantes.

#### **Novena. Vixencia do convenio**

O convenio estará en vigor desde a súa sinatura ata o 31 de decembro de 2022.

#### **Décima. Resolución**

O convenio extinguirase polo cumprimento das actuacións que constitúen o seu obxecto ou por incorrer nalgunha causa de resolución.

Serán causas de resolución:

1. O transcurso do prazo máximo de vixencia.
2. O acordo unánime das entidades asinantes.



3. O incumprimento das obrigas e dos compromisos asumidos por parte dalgunha das entidades asinantes. Neste caso, enviaráselle á parte incumpridora un requirimento para que, no prazo sinalado, cumpra coas obrigas ou cos compromisos que se consideren non resoltos. Isto comunicaráselle tamén á persoa responsable da comisión de seguimento. Se, transcorrido o prazo indicado no requirimento, persistise o incumprimento, a parte que o dirixiu notificaralle á outra a concorrencia da causa de resolución e entenderase o convenio como resolto, o que poderá dar lugar á indemnización polos prexuízos causados.
4. Decisión xudicial declaratoria da nulidade do convenio.
5. Calquera outra causa distinta das anteriores prevista no convenio ou noutras leis.

### **Décimo primeira. Normativa aplicable e xurisdición competente**

Este acordo ten natureza administrativa e rexerese polas súas cláusulas; polo Real decreto legislativo 2/2004, de 5 de marzo, polo que se aproba o Texto refundido da Lei reguladora das facendas locais; pola lexislación básica do Estado en materia de réxime local; polas Bases de execución do Orzamento provincial; pola LRXSP; así como polas restantes normas de dereito administrativo aplicables e, no seu defecto, polo dereito privado.

Así mesmo, a falta de entendemento previo pola comisión de seguimento e control, as partes quedan sometidas á xurisdición contencioso-administrativa na resolución de posibles controversias que puidesen suscitar o incumprimento ou a interpretación do convenio.

Estando as partes conformes co sentido deste documento, asínano no lugar e na data indicados no encabezamento.

Asinado dixitalmente na portada do encabezamento